

Headline	Pergerakan penduduk Kampong Bharu dihadkan		
MediaTitle	Sinar Harian		
Date	19 Apr 2020	Color	Full Color
Section	Nasional	Circulation	140,000
Page No	31	Readership	420,000
Language	Malay	ArticleSize	330 cm ²
Journalist	N/A	AdValue	RM 6,996
Frequency	Daily	PR Value	RM 20,988



Pergerakan penduduk Kampong Bharu dihadkan

KUALA LUMPUR - Pergerakan penduduk Kampong Bharu di sini dihadkan apabila tidak dibenarkan keluar dari kampung berkenaan oleh pihak berkuasa bermula semalam.

Tinjauan *Sinar Ahad* mendapati anggota Polis Diraja Malaysia (PDRM) dan Tentera Laut Diraja Malaysia (TLDM) mengawasi setiap sekatan jalan raya di pintu masuk dan keluar Kampong Bharu.

Seorang penduduk, Khalili Yunus, 55, berkata, mereka hanya dibenarkan untuk membeli barang keperluan dalam kawasan kampung dengan menunggang motosikal atau berjalan kaki.

"Kami boleh keluar untuk beli barang keperluan tetapi dengan menunggang motosikal atau jalan kaki, malah kami juga tidak dibenarkan keluar dari kawasan kampung," katanya di sini.

Khalili yang bekerja sebagai pemandu teksi berkata, dia hanya keluar bekerja sekiranya menerima tempahan daripada pelanggan untuk mengurangkan pergerakan.

"Jumlah pelanggan semakin kurang dan saya hanya dapat kira-kira

RM50 sehari bagi menyara isteri dan lapan orang anak memandangkan bantuan yang diumumkan kerajaan kepada pemandu teksi belum diterima," katanya.

Seorang lagi penduduk Kampong Bharu, Putih Md Zain, 60, berkata, keadaan di kampung berkenaan semakin sunyi sejak Perintah Pergerakan Kawalan (PKP) dikuatkuasakan pada 18 Mac lalu.

"Pada waktu siang, ada beberapa kenderaan dapat dilihat kerana ada penduduk keluar membeli barang

keperluan tetapi menjelang malam, kampung ini jadi sunyi," katanya.

Sementara itu, Ketua Polis Daerah Dang Wangi, Asisten Komisioner Mohd Fahmi Visuvanathan Abdullah berkata, sebanyak tiga sekatan jalan raya dibuat di dalam kawasan Kampong Bharu bermula kelmarin sebagai langkah memperkasakan pelaksanaan PKP di kawasan berkenaan.

"Sekatan jalan raya dalam kampung ini juga bertujuan untuk menghadkan pergerakan penduduk di kawasan terlibat," katanya.



Pihak berkuasa mengawal pintu keluar dan masuk di Kampong Bharu semalam.



Laluan dan lorong yang menghubungkan kampung-kampung kecil di Kampong Bharu ditutup berikutan kawasan berkenaan diwartakan sebagai zon merah.